






# Bapaalaayab Anau di búbaarab



1 Kasofoorak kati Anau di búbaarab let jaat, waaf wapioe bo.




2 Búbaarab búkaanunkaanum di bapaalaay bukila biyok súumesum di bo, kalako di anau, funakafu búrom. Pámbuyiin anau di balaab di fárusafu.



3 Wuj bo simit, búbaarab kabaak, kabaak biyok anau ákoli, naceej maame : « Hée, au Emitey, búbaarab kabaak to iña. Ukáanumutujaaj, buñoolene buñarulom mátaaňi kajom. »




4 Anau nápur beet eceen manaate kálakoum di uru. Nákamboor di sambun saam kareemen uyaaj.



5 Anau námiken sambunas siwonooras soola. Sambunas di siregool musaanaay majuupoe majakut maate kakajen bapaalaayab batí búbaarab di anau. Ñaa di soone anau : « Ahakay, cenceej úkoofi ! Búbaarab, waaf wálapute. Wákon keb, bumaje dée : kabaak benen wuj taatu, di buñes kakajeni. »



6 Sambunas di soonoo ma : « Jantenom jak ! Au ubajut sembe nen inje, sof fúniiraf fáamakaf ufe. Uríinujaa, nulenger búbaarab kaan uyaaj uban, nutebulomuwo beet taate. »





7 Anau náatul, najaw beet to di búbaarab. Nakaan wan sambunas siregoomi. Nápurenul fúniiraf, natoon epitén búbaarab di fumuumaf, nating waanaw alinger.



Búbaarab di bujajo, di buwonlo. Bujoolenut butey di bujuum to. Di bujiker anau púr to di búrulen boone :  
« Au anau, apaalom ati fuken an ibuuñami, wan ukaanomuñaa wúsumutom muk bare letifuuñet di au mati nimamanj alatoorum sambunas aregi úbukrenom moome. Panibonketi, letifuuñet di au, nifaj manisofi jak. Bare noote emanj iñee ibajut kákamun kati karitoor di au. Nutiting fumuumaf fúmba (úkamunaw). Noote esof lit, manujo'ol ulako'om to iña tíkara nigoogeni, poop nubaj biinaatab búmba. »





9 Anau napuño, nasof sifaayen di búleputab ban akaanuña. Najanfajanfa apaalool, mokammi nasof warinomi di buroñab boola, panakin tin tákon di búbaarab. Nanjar wanaw wan atingumi manateep eluup lof di apaalool búbaarab.

10 Pio bo, búbaarab di búsuronjul waan wikeen, di bubuk, di bulaañ búkuumen anau di bukanak kati eluupey yoola. Noo púrutomi, anau namanj tínaay yati búbaarab.



11 Roo kammi anau jaat ajoolenut akin tin, oo básuwenut búbaar beet kálabiyen bapaalayab boola di búbaarab.



This work is licensed under a Creative Commons Attribution Non-Commercial No Derivatives (CC BY-NC-ND) License.